

REGIONAL NEWS UNIT
ALL INDIA RADIO, AGARTALA
Date: 15-04-2024
Time: 07:55-08:05 PM Hrs
BENGALI EVENING BULLETIN

Headlines :

- (১) বিজেপি'র বরিষ্ঠ নেতা কেন্দ্রীয় স্বরাষ্ট্রমন্ত্রী অমিত শাহ আজ দুপুরে ঊনকোটি জেলার কুমারঘাটের P.W.D ময়দানে বি,জে,পি আয়োজিত নির্বাচনী জনসভায় ভাষণ দেন ।
- (২) পশ্চিম ত্রিপুরা লোকসভা আসনে আজ থেকে অত্যাবশ্যকীয় পরিষেবায় নিযুক্ত কর্মীদের পোস্টাল ব্যালটে ভোট গ্রহণ শুরু হয়েছে ।
- (৩) কংগ্রেস নেত্রী প্রিয়াঙ্কা গান্ধী আগামীকাল আগরতলায় আসছেন ।
- (৪) কৈলাশহরে অবস্থিত শৈবতীর্থ ঊনকোটি পাহাড়ে আজ থেকে দু'দিনব্যাপী অশোকাষ্টমী মেলা শুরু হয়েছে ।

Amit Shah-Rally-Unakoti :

বিজেপি'র বরিষ্ঠ নেতা কেন্দ্রীয় স্বরাষ্ট্রমন্ত্রী অমিত শাহ আজ দুপুরে ঊনকোটি জেলার কুমারঘাটের P.W.D ময়দানে বি,জে,পি আয়োজিত এক নির্বাচনী জনসভায় ভাষণ দেন। তিনি বলেন, প্রধানমন্ত্রী নরেন্দ্র মোদির নেতৃত্বে গোটা দেশের সঙ্গে ত্রিপুরাতে

প্রভূত বিকাশ ঘটেছে। দেশে ২ কোটি ৯৪ লক্ষ পরিবার পাকাঘর পেয়েছেন। তিনি বলেন, আদিবাসীদের সম্মান, ও সুরক্ষা প্রদান এবং অগ্রগতি করেছে বি,জে,পি নেতৃত্বাধীন বর্তমান সরকার। তিনি বলেন, আদিবাসী উন্নয়নে বাজেট বরাদ্দ আগেকার ২৪ হাজার কোটি টাকা থেকে বাড়িয়ে ১ লক্ষ ২৫ হাজার কোটি টাকা করা হয়েছে। এপ্রসঙ্গে তিনি, ভারত সরকার, ত্রিপুরা সরকার ও তিপরা মথা'র মধ্যে সম্পাদিত চুক্তির বিষয়ে আলোকপাত করেন। মহারাজা বীরবিক্রমের প্রতি কেন্দ্রীয় সরকারের যথাযথ সম্মান প্রদর্শনের কথাও তিনি উল্লেখ করেন। তিনি কংগ্রেস ও সিপিআইএম দলেরও সমালোচনা করেন। জনসভায় ভাষণ দেন, কেন্দ্রীয় সামাজিক ন্যায় বিচার ও ক্ষমতায়ন মন্ত্রকের রাষ্ট্রমন্ত্রী প্রতিমা ভৌমিক, মুখ্যমন্ত্রী অধ্যাপক ডাঃ মানিক সাহা, পশ্চিম ত্রিপুরা লোকসভা আসনের প্রার্থী সাংসদ বিপ্লব কুমার দেব, বি,জে,পি'র প্রদেশ সভাপতি রাজীব ভট্টাচার্য, তিপরা মথা'র প্রাক্তন চেয়ারম্যান মহারাজা প্রদ্যোৎ কিশোর মানিক্য দেববর্মা, সমবায়মন্ত্রী শুল্লাচরণ নোয়াতিয়া, বনমন্ত্রী অনিমেষ দেববর্মা প্রমুখ। সমাবেশে পূর্ব ত্রিপুরা লোকসভা আসনের বিজেপি প্রার্থী কৃতি দেবী দেববর্মাও উপস্থিত ছিলেন।

ELECTION POSTAL BALLOT VOTING :

পশ্চিম ত্রিপুরা লোকসভা আসনে আজ থেকে অত্যাৱশ্যকীয় পরিষেবায় নিযুক্ত কর্মীদের পোস্টাল ব্যালটে ভোট গ্রহণ শুরু হয়েছে। এই ভোটদান চলবে আগামী ১৭ই এপ্রিল পর্যন্ত। রাজ্যের অতিরিক্ত মুখ্য নির্বাচন আধিকারিক সুভাশিস ব্যানার্জি আজ এই সংবাদ জানান। তিনি জানান, আগামীকাল থেকে ভোট কর্মী,

নিরাপত্তা কর্মী, গাড়ি চালক, হেল্পারদের পোস্টাল ব্যালটে ভোটগ্রহণ শুরু হবে। পশ্চিম ত্রিপুরা আসনের জন্য এই ভোটদান চলবে আগামী ১৭ই এপ্রিল পর্যন্ত। এই আসনে আনুমানিক ১৩ হাজার ভোট কর্মী ভোটদান করবেন বলে আশা করা যাচ্ছে। তিনি জানান, পশ্চিম ত্রিপুরা আসনের অন্তর্গত মহকুমা সদরগুলোতে কড়া নিরাপত্তার মধ্যে দিয়ে পোস্টাল ব্যালটে ভোট গ্রহণ চলছে। সদর মহকুমার অন্তর্ভুক্ত বিধানসভা আসন অনুযায়ী সাংবাদিকসহ অত্যাবশ্যকীয় পরিসেবার সঙ্গে যুক্তরা আজ আগরতলার শিশু বিহার স্কুলের ভোটদান কেন্দ্রে পোস্টাল ব্যালটে ভোট দান করেন। এই আসনের রিটার্নিং অফিসার পশ্চিম জেলার জেলা শাসক ডা; বিশাল কুমার ভোটদান প্রক্রিয়া পরিদর্শন করেন। উল্লেখ্য নির্বাচন কমিশনের সিদ্ধান্ত অনুযায়ী এ বারই প্রথম কমিশন প্রদত্ত বিশেষ সচিত্র পরিচয়পত্র প্রাপক সাংবাদিকরা পোস্টাল ব্যালটে ভোটদানের সুযোগ পেয়েছেন।

Postal Ballot-Dhalai :

আমবাসা পঞ্চায়েত রাজ ট্রেনিং ইনস্টিটিউটে আজ রাজ্যের দুটি লোকসভা নির্বাচনী ক্ষেত্রের পোস্টাল ব্যালট বিনিময় করা হয়। এক সাক্ষাৎকারে পূর্ব ত্রিপুরা লোকসভা কেন্দ্রের রিটার্নিং অফিসার সাজু ওয়াহিদ এ আজ জানিয়েছেন, আগামীকাল এবং ১৭ই এপ্রিল পূর্ব ত্রিপুরা লোকসভা আসনের অধীন সবকটি সহকারী রিটার্নিং অফিসারের অফিসে পশ্চিম ত্রিপুরা লোকসভা কেন্দ্রের জন্য পোস্টাল ব্যালটে ভোট গ্রহণ করা হবে। তাছাড়া আগামী ২২ এবং ২৩শে এপ্রিল পূর্ব ত্রিপুরা লোকসভা কেন্দ্রের জন্য সারা রাজ্যে পোস্টাল ব্যালটে ভোটগ্রহণ করা হবে।

Congress :

কংগ্রেস নেত্রী প্রিয়াঙ্কা গান্ধী আগামীকাল আগরতলায় আসছেন। বেলা দুটো পঞ্চাশ মিনিট নাগাদ বিমানবন্দরে পৌঁছোলে স্থানীয় কংগ্রেস নেতৃবৃন্দ তাঁকে স্বাগত জানাবেন। সেখান থেকে মিছিল করে সার্কিট হাউস এলাকা হয়ে শ্রীমতী গান্ধীকে নিয়ে একটি মিছিল উত্তর গেইট, কর্নেল চৌমুহনী, বিদুরকর্তা চৌমুহনী, উজ্জয়ন্ত প্রসাদ, কামান চৌমুহনী হয়ে সূর্য চৌমুহনী যাবে। সেখানে সভায় শ্রীমতী গান্ধী বক্তব্য রাখেন। তারপর সূর্য চৌমুহনী থেকে একটি মিছিল পোস্ট অফিস চৌমুহনী, প্যারাডাইস চৌমুহনী, বটতলা হয়ে ফায়ার ব্রিগেড চৌমুহনী দিয়ে দুর্গা চৌমুহনী যাবে। আজ কংগ্রেস ভবনে সাংবাদিক সম্মেলনে একথা জানিয়েছেন কংগ্রেস নেতা তথা বিধায়ক সুদীপ রায় বর্মণ।

All political Party Meeting-Santirbazar :

লোকসভা নির্বাচনকে শান্তিপূর্ণভাবে সম্পন্ন করতে আজ শান্তিরবাজার মহকুমা শাসকের অফিসে বিভিন্ন রাজনৈতিক দলের প্রতিনিধিদের নিয়ে এক সর্বদলীয় সভা অনুষ্ঠিত হয়। সভায় পশ্চিম ত্রিপুরা লোকসভা আসনের অধীন শান্তিরবাজার বিধানসভা কেন্দ্রের সহকারী রিটার্নিং অফিসার- মহকুমা শাসক অভেদানন্দ বৈদ্য, পূর্ব ত্রিপুরা লোকসভা আসনের অধীন জোলাইবাড়ি বিধানসভার সহকারী রিটার্নিং অফিসার দেবজ্যোতি রায়, মহকুমা পুলিশ আধিকারিক সৌগত চাকমা প্রমুখ উপস্থিত ছিলেন। দুই কেন্দ্রের সহকারী রিটার্নিং অফিসারগণ নির্বাচনী

আচরণবিধি যথাযথভাবে মেনে চলতে এবং শান্তিপূর্ণভাবে নির্বাচন সম্পন্ন করার লক্ষ্যে সহযোগিতা করার জন্য রাজনৈতিক দলের প্রতিনিধিদের প্রতি অনুরোধ জানান। সভায় সিপিআইএম, কংগ্রেস, বিজেপি ও তিপ্রামথা দলের প্রতিনিধিরা উপস্থিত ছিলেন।

SHAI SHAB-Kailashahar :

ঊনকোটি জেলা আইনসেবা কর্তৃপক্ষ এর উদ্যোগে আজ কৈলাশহরের নেতাজি বিদ্যাপীঠ ইংরাজি মাধ্যম বিদ্যালয়ে এক আলোচনাচক্র অনুষ্ঠিত হয়। শিশুদের আইনগত অধিকার, যত্ন ও সুরক্ষা বিষয়ে চালু প্রকল্প "শৈশব " এর বিভিন্ন দিক নিয়ে আলোচনা করা হয়। বক্তব্য রাখেন, আইনজীবী অর্চনা সিনহা ও জয়দীপ দত্ত, শিক্ষিকা অর্চিতা দে প্রমুখ।

ECI :

২০২৪ সালের সাধারণ নির্বাচন প্রক্রিয়া চলাকালীন দেশের ৭৫ বছরের ইতিহাসে রেকর্ড পরিমাণে প্রলোভনের কাজে বা উৎকোচের জন্য ব্যবহারের অর্থ ও অন্যান্য সামগ্রী আটক করা হয়েছে। এনফোর্সমেন্ট এজেন্সিগুলি ৪,৬৫০ কোটিরও বেশী টাকা বাজেয়াপ্ত করেছে। ২০১৯ সালের লোকসভা নির্বাচনের সময় ৩,৪৭৫ কোটি টাকার বেশি বাজেয়াপ্ত করা হয়েছিল। এছাড়াও প্রচুর পরিমাণে মাদক দ্রব্য আটক করা হয়েছে। একীভূত প্রতিরোধ ব্যবস্থা, নাগরিকদের সক্রিয় অংশগ্রহণ এবং প্রযুক্তির সর্বোত্তম সম্পৃক্ততার দ্বারা এগুলি বাজেয়াপ্ত করা সম্ভব হয়েছে।

Ashokashtami Mela-UNAKOTI :

কৈলাশহরে অবস্থিত শৈবতীর্থ ঊনকোটি পাহাড়ে আজ থেকে দু'দিনব্যাপী অশোকাষ্টমী মেলা শুরু হয়েছে। আজ সন্ধ্যায় অশোকাষ্টমী মেলার আনুষ্ঠানিক উদ্বোধন করেন, কৈলাশহরের অতিরিক্ত মহকুমা শাসক নবকুমার জমাতিয়া। উদ্বোধনী অনুষ্ঠানে বক্তব্য রাখেন, মহকুমা কল্যাণ আধিকারিক মতিরঞ্জন দেববর্মা, তথ্য-সংস্কৃতি দপ্তরের সহ-অধিকর্তা বিশ্বজিৎ দেব। ঐতিহ্যবাহী মেলা উপলক্ষে রাজ্য-বহির্রাজ্য থেকে প্রচুর পুন্যার্থী-দর্শনার্থী মেলায় এসেছেন। নানাস্থান থেকে দোকানিরা তাদের পসরা নিয়ে মেলায় এসেছেন। আজ সারারাতব্যাপী সাংস্কৃতিক অনুষ্ঠানের আয়োজন করা হয়েছে। আগামীকাল ভোরে অশোকাষ্টমী উপলক্ষ্যে অনেক পুন্যার্থী ঊনকোটির পবিত্র সীতাকুণ্ডে অবগাহন করবেন। শান্তি ও সুস্থিতি বজায় রাখতে ব্যাপক নিরাপত্তা ব্যবস্থা গ্রহণ করেছে পুলিশ প্রশাসন।

VASANTI PUJA :

আজ থেকে শুরু হয়েছে বাসন্তী পূজা। আজ দেবী দুর্গার অন্য রূপ হল বাসন্তী দেবী। আগরতলার দুর্গাবাড়িতে চিরাচরিত প্রথা মেনে এবারও বাসন্তী পূজার আয়োজন করা হয়েছে। সন্ধ্যায় দুর্গাবাড়িতে ছিল দর্শনার্থীদের উপচে পরা ভিড়। দুর্গাবাড়ি ছাড়াও আগরতলার আনন্দময়ী আশ্রমেও এই পূজার আয়োজন করা হয়েছে। এছাড়া বিভিন্ন বাড়ি, ক্লাব স্বেচ্ছাসেবী সংস্থার উদ্যোগেও বাসন্তী পূজার আয়োজন করা হয়েছে। বৃহস্পতিবার দশমী বিহিত পূজা ও বিসর্জনের মধ্যে দিয়ে শেষ হবে চারদিনের এই পূজা।

BJP & India Bloc Sepahijala :

সিপাহীজলা জেলার কমলাসাগর বিধানসভা কেন্দ্রের অধীন মধুপুর বাজারে আজ বিজেপির এক নির্বাচনী সভা অনুষ্ঠিত হয়। বক্তব্য রাখেন পশ্চিম ত্রিপুরা লোকসভা কেন্দ্রের বি.জে.পি প্রার্থী সাংসদ বিপ্লব কুমার দেব, বিধায়ক অন্তরা সরকার দেব, সিপাহীজলা জিলা পরিষদের সভাধিনেত্রী সুপ্রিয়া দাস দত্ত প্রমুখ। ভাষণে বিপ্লব কুমার দেব রাজ্য ও দেশের উন্নয়নের চিত্র তুলে ধরার পাশাপাশি বিরোধীদের সমালোচনা করেন। অপরদিকে বিশ্রামগঞ্জ মোটরস্ট্যান্ড এলাকায় ইন্ডিয়া জোট প্রার্থী আশীষ কুমার সাহার সমর্থনে এক সভা অনুষ্ঠিত হয়। এই সভায় বিরোধী দলনেতা জিতেন্দ্র চৌধুরী, প্রাক্তন মন্ত্রী ভানুলাল সাহা, কংগ্রেস নেতা দিবাচন্দ্র রাঙ্কল প্রমুখ বক্তব্য রাখেন।

Election Campaign India Bloc-Udaipur :

পশ্চিম ত্রিপুরা লোকসভা আসনে ইন্ডিয়া জোট সমর্থিত কংগ্রেস প্রার্থী আশীষ কুমার সাহার সমর্থনে আজ উদয়পুরে এক মিছিল অনুষ্ঠিত হয়। মিছিলটি উদয়পুর জামতলা সিপিএম পার্টি অফিসের সামনে থেকে শুরু হয়ে, সেন্ট্রাল রোড-নিউ টাউন রোড হয়ে জামতলাতে গিয়ে শেষ হয়। সেখানে এক সভায় প্রাক্তন মন্ত্রী রতন ভৌমিক ও কংগ্রেস প্রার্থী আশীষ কুমার সাহা কেন্দ্রীয় ও রাজ্য সরকারের বিভিন্ন নীতির সমালোচনা করে বক্তব্য রাখেন।

Election campaign-Dipak Majumder :

রামনগর বিধানসভা কেন্দ্রের উপনির্বাচনে বিজেপি প্রার্থী দীপক মজুমদার আজ আগরতলার কৃষ্ণনগরস্থিত ঠাকুরপল্লী, টি.আর.টি.সি এলাকায় বাড়ি বাড়ি ভোট প্রচার করেন। তাছাড়া শ্রী মজুমদার আজ প্রাক্তন মুখ্যমন্ত্রী মানিক সরকারের সরকারী বাসভবনে গিয়েও ভোট প্রার্থনা করেন।

Forward Block :

সারা ভারত ফরওয়ার্ড ব্লক রাজ্য কমিটি আসন্ন লোকসভা নির্বাচনে ভোটাররা যাতে নির্ভয়ে ভোট দিতে পারেন তার জন্য প্রয়োজনীয় ব্যবস্থা গ্রহণ করতে নির্বাচন কমিশনের কাছে দাবি জানিয়েছে। আজ আগরতলার প্রেসক্লাবে সাংবাদিক সম্মেলনে একথা জানিয়েছেন ফরওয়ার্ড ব্লক রাজ্য কমিটির আহবায়ক পরেশ চন্দ্র সরকার। তিনি রাজ্যের বর্তমান আইন শৃঙ্খলার পরিস্থিতি উল্লেখ করে রাজ্য সরকারের সমালোচনা করেন।

Paresh Chakraborty :

প্রয়াত হলেন রাষ্ট্রপতি পুরস্কার প্রাপ্ত-প্রাক্তন প্রধান শিক্ষক পরেশ চক্রবর্তী। আজ সকালে তিনি আগরতলার জিবি হাসপাতালে শেষ নিঃশ্বাস ত্যাগ করেন। মৃত্যুকালে তাঁর বয়স হয়েছিল ৮৮ বছর। তিনি দীর্ঘদিন আগরতলা ধলেশ্বরস্থিত রামকৃষ্ণ বিবেকানন্দ বিদ্যামন্দিরের প্রধান শিক্ষকের দায়িত্বে ছিলেন। গাঙ্গাইল রোডস্থিত রামকৃষ্ণ মিশন ও রানীরখামার রামকৃষ্ণ আশ্রমের প্রতিষ্ঠাতা সদস্য ছিলেন তিনি। ১৯৯২ সালে তিনি রাষ্ট্রপতি পুরস্কারে ভূষিত হন।

আজ সন্ধ্যায় রানীর খামার আশ্রম প্রাঙ্গনে তার শেষ কৃত্য সম্পন্ন হয়। তাঁর মৃত্যুতে মুখ্যমন্ত্রী অধ্যাপক ডাঃ মানিক সাহা গভীর শোক ব্যক্ত করেছেন।

State Level Sangrain Festival :

দক্ষিণ জেলার জেলাইবাড়ি ব্লকের পূর্ব চরকবাইয়ের মগ পাড়ায় আজ থেকে দুইদিনের রাজ্যভিত্তিক সাংগ্রাই উৎসব শুরু হয়েছে। উৎসবের সূচনা করেন মনুবনকুলের ধম্মদ্বীপা স্কুল ও ধম্মদ্বীপা আন্তর্জাতিক বৌদ্ধ বিশ্ববিদ্যালয়ের প্রতিষ্ঠাতা ভেন ধম্মপ্রিয়া। শান্তিরবাজার মহকুমা শাসক অভেদানন্দ বৈদ্য, জাতীয় পুরস্কার প্রাপ্ত শিল্পী কামফরু মগ প্রমুখ অনুষ্ঠানে উপস্থিত ছিলেন। তথ্য সংস্কৃতি দপ্তর, মগ সোসিও কালচারাল অর্গানাইজেশন ও মগ ইয়ুথ অর্গানাইজেশন আয়োজিত সাংগ্রাই উৎসব উপলক্ষে বন, কৃষি ও পূর্ত দপ্তরের তিনটি প্রদর্শনী মন্ডপ খোলা হয়। প্রসঙ্গত, উল্লেখ্য সাংগ্রাই উৎসব হল মগ সম্প্রদায়ের বর্ষ বিদায় ও বর্ষবরণের উৎসব।

Congress Press Meet :

কংগ্রেস বিধায়ক গোপাল রায় দাবী করেছেন আসন্ন লোকসভা নির্বাচনে কংগ্রেস দল ক্ষমতায় এলে দেশের মহিলাদের সার্বিক স্বার্থ সুরক্ষা নিশ্চিত করা হবে। আজ আগরতলায় প্রদেশ কংগ্রেস ভবনে আয়োজিত এক সাংবাদিক সম্মেলনে বিধায়ক শ্রী রায় এই দাবী উল্লেখ করেন। তাছাড়া তিনি কংগ্রেসের নির্বাচনী ইস্তেহারে প্রতিশ্রুতিগুলি বিস্তারিত উল্লেখ করেন। সাংবাদিক সম্মেলনে

উপস্থিত ছিলেন কংগ্রেসের সর্বভারতীয় সাধারণ সম্পাদিকা জারিতা লাইতফ্লাং।

T-20 Cricket :

টিসিএ পরিচালিত সমীরণ চক্রবর্তী স্মৃতি ঘরোয়া টি-২০ ক্রিকেট প্রতিযোগিতার সেমিফাইনালের লাইনআপ চূড়ান্ত হয়েছে। আগামী ১৭ এপ্রিল ইউনাইটেড ফ্রেন্ডস খেলবে চলমান সংঘের বিরুদ্ধে এবং সংহতি ক্লাব খেলবে জয়নগর ক্রিকেট ক্লাবের বিরুদ্ধে। আজ আসরের চারটি কোয়ার্টার ফাইনাল অনুষ্ঠিত হয়। এতে নরসিংগড়ের টিআইটি মাঠে চলমান সংঘ ছয় উইকেটে সফুলিঙ্গ ক্লাবকে, এম বি বি স্টেডিয়ামে দুটি খেলায় ইউনাইটেড ফ্রেন্ডস ১০০ রানে ইউনাইটেড বি এস টি এবং অপর খেলায় জয়নগর ক্রিকেট ক্লাব ২০ রানে কসমোপলিটন ক্লাবকে পরাজিত করে। এছাড়া নরসিংগড়ের পিটিএ মাঠে অনুষ্ঠিত খেলায় সংহতি ক্লাব ৭৯ রানে ব্লাডমাউথ ক্লাব হারিয়ে দেয়। আসরের ফাইনাল ম্যাচ আগামী ২১ এপ্রিল হবে।

Weather :

আগামীকাল আকাশ আংশিক মেঘাচ্ছন্ন থাকবে। দুয়েক জায়গায় বজ্র বিদ্যুত সহ হালকা থেকে মাঝারি পর্যায়ে বৃষ্টিপাতের সম্ভাবনা রয়েছে। তাপমাত্রা সর্বোচ্চ ছত্রিশ ডিগ্রী এবং সর্বনিম্ন ছাব্বিশ ডিগ্রী সেলসিয়াস এর কাছাকাছি থাকবে। আজ দিনের সর্বোচ্চ তাপমাত্রা ছিল সাঁইত্রিশ দশমিক তিন ডিগ্রী সেলসিয়াস এবং সর্বনিম্ন পঁচিশ দশমিক সাত ডিগ্রী সেলসিয়াস। আগামী চব্বিশ

ঘন্টায় রাজ্যের সব জেলায় বিক্ষিপ্তভাবে বজ্র বিদ্যুত সহ
বৃষ্টিপাতের সতর্কতা জারি করেছে আবহাওয়া দপ্তর।
